

# Sukarelawan UMP sedia bantu urus Sukum 2018

*Utusan Malaysia (Alam Melayu) Rabu 11/7/18 M/522*

**KUANTAN 10 Julai** - Seramai 180 sukarelawan yang terdiri daripada staf dan mahasiswa **Universiti Malaysia Pahang (UMP)** menyertai program persediaan dan pemantapan menjelang Kejohanan Sukan Antara Staf Universiti Malaysia (Sukum) 2018 yang dijadual berlangsung bulan depan.

Kejohanan selama sembilan hari bermula 10 Ogos itu menyaksikan lebih 2,000 atlet dan pegawai sukan berkampung di universiti tersebut yang menjadi tuan rumah dalam penganjuran kali ini.

Sukum 2018 mempertaruhkan lebih 300 pingat dalam 17 acara sukan dipertandingkan antaranya bola sepak, bola jaring, tenis, olahraga, basikal dan badminton.

Pengarah Pusat Sukan dan Kebudayaan UMP, Abd. Rahman Safie berkata, bagi melancarkan

penganjuran kali ini, sukarelawan Sukum baru-baru ini mengikuti program persediaan dan pemantapan dari segi pengurusan penginapan atlet, teknikal dan pertandingan serta logistik.

“Program ini juga dapat memupuk semangat kesukarelaan dalam kalangan staf dan mahasiswa UMP dalam memastikan semua acara diurus dengan baik,” katanya di sini hari ini.

Menurut Abd. Rahman, kumpulan sukarelawan yang mantap dan mempunyai semangat ukhuwah tinggi diperlukan bagi memastikan Kejohanan Sukum 2018 berjalan lancar.

Beliau berharap barisan sukarelawan yang dipilih dapat memberi khidmat terbaik bagi melancarkan perjalanan Sukum 2018 yang julung kalinya diada-

kan di UMP.

Dalam pada itu, Pengurus Jabatan Jaringan Industri dan Masyarakat UMP, Mohd. Raizal-hilmy Mohd. Rais yang juga Ketua Sukarelawan Sukum 2018 berkata, kumpulan berkenaan sudah bersedia mengalas tanggungjawab besar sebagai ‘duta kecil’ UMP untuk kejohanan itu nanti.

Katanya, para peserta telah menimba pengalaman dalam perkongsian tugas sukarelawan, latihan amali dan tugasan berkumpulan mengikut jawatankuasa yang disediakan.

“Amalan ceria, berbudu bahasa, bersemangat dan bertoleransi dalam apa juga situasi yang bakal ditempuhi menjadi keutamaan buat mereka yang dipilih sebagai sukarelawan,” katanya.



**SUKARELAWAN** yang mengikuti program persediaan dan pemantapan bergambar menjelang Sukum 2018 di UMP bulan depan.